



Deddf Llywodraeth Leol (Democratiaeth) (Cymru) 2013

2013 dccc 4

Deddf gan Gynulliad Cenedlaethol Cymru i wneud darpariaeth ynghylch cyfansoddiad a swyddogaethau Comisiwn Ffiniau a Democratiaeth Leol Cymru; i wneud darpariaethau amrywiol sy'n ymwneud â llywodraeth leol; ac at ddibenion cysylltiedig. [30 Gorffennaf 2013]

Gan ei fod wedi ei basio gan Gynulliad Cenedlaethol Cymru a chael cydsyniad Ei Mawrhydi, deddfir fel a ganlyn:-

RHAN 1

CYFLWYNIAD

1 Trosolwg

- (1) Mae'r Rhan hon yn rhoi trosolwg o ddarpariaethau'r Ddeddf hon.
- (2) Mae Rhan 2 yn ailenwi'r Comisiwn Ffiniau Llywodraeth Leol i Gymru yn Gomisiwn Ffiniau a Democratiaeth Leol Cymru ac yn diwygio ei gyfansoddiad a'i swyddogaethau.
- (3) Mae Rhan 3 yn gwneud darpariaeth ynghylch—
 - (a) dyletswyddau'r Comisiwn i fonitro'r trefniadau ar gyfer llywodraeth leol a, lle y bo'n briodol, i gynnal adolygiadau, a dyletswyddau prif gynghorau i fonitro'r trefniadau ar gyfer y cymunedau yn eu hardal a, lle y bo'n briodol, i gynnal adolygiadau (gweler adrannau 21 a 22),
 - (b) y mathau o adolygiadau y gellir eu cynnal, yr ystyriaethau i'r corff adolygu eu hystyried a'r newidiadau y gellir eu hargymell mewn perthynas â phob math o adolygiad (gweler adrannau 23 i 33),
 - (c) y weithdrefn ar gyfer cynnal adolygiadau (gweler adrannau 34 i 36),

- (d) gweithredu argymhellion yn dilyn adolygiad a materion cysylltiedig (megis trosglwyddo staff neu eiddo rhwng prif gynghorau a chyrrff cyhoeddus eraill) (gweler adrannau 37 i 44).
- (4) Mae Rhan 4 yn gwneud darpariaeth ynghylch adolygu aelodaeth cyrrff cyhoeddus penodol.
- (5) Mae Rhan 5 yn gwneud darpariaeth—
- (a) ynghylch penodi aelod llywyddol prif gyngor;
 - (b) sy'n ailddatgan ac yn ymestyn pwerau awdurdodau lleol mewn perthynas â hyrwyddo a gwrthwynebu Biliau preifat;
 - (c) sy'n ei gwneud yn ofynnol i wybodaeth cynghorau cymuned fod ar gael ar ffurf electronig;
 - (d) ynghylch cyhoeddi cofrestrau o fuddiannau aelodau cyrrff cyhoeddus penodol (gan gynnwys awdurdodau lleol) yn electronig;
 - (e) yn ymwneud â mynychu cyfarfodydd prif gynghorau o bell;
 - (f) yn ymwneud â rôl pwyllgorau gwasanaethau democrataidd;
 - (g) sy'n cymhwysio gofynion o ran cydbwysedd gwleidyddol i bwyllgorau archwilio prif bwyllgorau;
 - (h) yn ymwneud â swyddogaethau Panel Annibynnol Cymru ar Gydabyddiaeth Ariannol a sut y mae'n paratoi adroddiadau;
 - (i) ynghylch sefydlu cyd-bwyllgorau safonau;
 - (j) sy'n galluogi'r pwyllgor safonau neu swyddog monitro awdurdod perthnasol i gyfeirio achosion sy'n ymwneud ag ymddygiad at bwyllgor safonau neu swyddog monitro awdurdod perthnasol arall.
- (6) Mae Rhan 6 yn gwneud darpariaeth gyffredinol ynghylch y Ddeddf hon.

RHAN 2

COMISIWN FFINIAU A DEMOCRATIAETH LEOL CYMRU

Parhad ac enw

2 Comisiwn Ffiniau a Democratiaeth Leol Cymru

- (1) Mae'r corff corfforaethol a enwir yn Gomisiwn Ffiniau Llywodraeth Leol i Gymru (a sefydlwyd o dan adran 53 o Ddeddf 1972) i barhau mewn bodolaeth.
- (2) Ond mae wedi ei ailenwi, ac mae i'w alw'n Gomisiwn Ffiniau a Democratiaeth Leol Cymru (y cyfeirir ato yn y Ddeddf hon fel "y Comisiwn").

Statws

3 Statws

- (1) Nid yw'r Comisiwn i'w ystyried yn was nac yn asiant i'r Goron nac yn un sy'n mwynhau unrhyw statws, imiwnedd neu fraint sydd gan y Goron.

- (2) Nid yw eiddo'r Comisiwn i'w ystyried yn eiddo'r Goron nac yn eiddo sy'n cael ei ddal ar ran y Goron.

Aelodau

4 Aelodaeth

- (1) Yr aelodau a ganlyn fydd aelodau'r Comisiwn—
- aelod i gadeirio'r Comisiwn (yr “aelod cadeirio”),
 - aelod i weithredu fel dirprwy i'r aelod cadeirio, ac
 - dim mwy na 3 aelod arall.
- (2) Mae'r aelodau i'w penodi gan Weinidogion Cymru ar delerau ac amodau a benderfynir gan Weinidogion Cymru (gan gynnwys amodau o ran tâl, lwfansau a threuliau).
- (3) Ni chaiff Gweinidogion Cymru benodi person sydd yn—
- aelod Seneddol;
 - aelod o Gynulliad Cenedlaethol Cymru;
 - aelod o awdurdod lleol yng Nghymru;
 - swyddog i awdurdod lleol yng Nghymru;
 - aelod o awdurdod Parc Cenedlaethol ar gyfer Parc Cenedlaethol yng Nghymru;
 - comisiynydd heddlu a throstedd ar gyfer ardal heddlu yng Nghymru; neu
 - aelod o staff y Comisiwn.

5 Deiliadaeth

Mae aelodau'r Comisiwn yn dal ac yn gadael swydd yn unol â thelerau ac amodau eu penodiad.

Trafodion

6 Trafodion

- (1) 3 yw'r cworwm ar gyfer cyfarfodydd o'r Comisiwn.
- (2) Fel arall, caiff y Comisiwn reoleiddio ei weithdrefn ei hun.
- (3) Nid yw unrhyw ddiffyg ym mhenodiad aelod yn effeithio ar ddilysrwydd unrhyw beth a wneir gan y Comisiwn.

7 Y sêl a dilysrwydd dogfennau

- (1) Caniateir i'r Comisiwn gael sêl.
- (2) Dilysir y weithred o osod y sêl drwy lofnod aelod o'r Comisiwn neu lofnod person arall sydd wedi ei awdurdodi gan y Comisiwn at y diben hwnnw.
- (3) Mae dogfen yr honnir ei bod wedi ei chyflawni'n briodol o dan sêl y Comisiwn, neu ei bod wedi ei llofnodi ar ei ran gan y prif weithredwr neu aelod arall o staff sydd wedi

ei awdurdodi i wneud hynny, i gael ei derbyn yn dystiolaeth a rhaid cymryd ei bod wedi ei chyflawni neu wedi ei llofnodi felly oni phrofir i'r gwrthwyneb.

Staff, arbenigwyr a chomisiynwyr cynorthwyol

8 Prif weithredwr

- (1) Rhaid i'r Comisiwn gyflogi prif weithredwr.
- (2) Mae'r prif weithredwr i'w benodi gan Weinidogion Cymru ar delerau ac amodau a benderfynir ganddynt (gan gynnwys amodau o ran tâl, pensiwn, lwfansau a threuliau).
- (3) Cyn penodi prif weithredwr, rhaid i Weinidogion Cymru ymgynghori â'r Comisiwn.

9 Staff eraill

- (1) Caiff y Comisiwn gyflogi staff.
- (2) Mae'r staff i'w cyflogi ar delerau ac amodau a benderfynir gan y Comisiwn (gan gynnwys amodau o ran tâl, pensiwn, lwfansau a threuliau).
- (3) Rhaid i'r Comisiwn ymgynghori â Gweinidogion Cymru cyn penderfynu ar y symiau sy'n daladwy i'w staff mewn cysylltiad â thâl, pensiynau, lwfansau a threuliau.

10 Arbenigwyr

- (1) Caiff y Comisiwn benodi person ("arbenigwr") i'w gynorthwyo i arfer ei swyddogaethau.
- (2) Cyn penodi arbenigwr rhaid i'r Comisiwn ymgynghori â Gweinidogion Cymru.
- (3) Ni chaniateir i benodiad o dan is-adran (1) gael ei wneud oni bai bod y Comisiwn wedi ei fodloni bod gan yr arbenigwr wybodaeth, profiad neu arbenigedd sy'n berthnasol i'r broses o arfer ei swyddogaethau.
- (4) Caiff y Comisiwn dalu unrhyw dâl, lwfansau neu dreuliau a benderfynir ganddo i'r arbenigwr.
- (5) Rhaid i'r Comisiwn ymgynghori â Gweinidogion Cymru cyn penderfynu ar y tâl neu'r lwfansau sy'n daladwy i arbenigwr.

11 Comisiynwyr cynorthwyol

- (1) Caiff y Comisiwn benodi person ("comisiynydd cynorthwyol") y caiff, at ddibenion adran 13, ddirprwyo swyddogaethau iddo.
- (2) Ond ni chaiff y Comisiwn benodi person sydd yn—
 - (a) aelod Seneddol;
 - (b) aelod o Gynulliad Cenedlaethol Cymru;
 - (c) aelod o awdurdod lleol yng Nghymru;
 - (d) swyddog i awdurdod lleol yng Nghymru;
 - (e) aelod o awdurdod Parc Cenedlaethol ar gyfer Parc Cenedlaethol yng Nghymru;
 - (f) comisiynydd heddlu a throsedd ar gyfer ardal heddlu yng Nghymru; neu

- (g) aelod o staff y Comisiwn.
- (3) Cyn penodi comisiynydd cynorthwyol rhaid i'r Comisiwn ymgynghori â Gweinidogion Cymru.
- (4) Caiff y Comisiwn dalu unrhyw dâl, lwfansau neu dreuliau a benderfynir ganddo i gomisiynydd cynorthwyol.
- (5) Rhaid i'r Comisiwn ymgynghori â Gweinidogion Cymru cyn penderfynu ar y tâl neu'r lwfansau sy'n daladwy i gomisiynydd cynorthwyol.

Pwerau cyffredinol a chyfarwyddiadau

12 Pwerau

- (1) Caiff y Comisiwn wneud unrhyw beth y bwriedir iddo hwyluso'r arferiad o'i swyddogaethau neu sy'n ffafriol i'r arferiad o'i swyddogaethau neu'n gysylltiedig â hynny.
- (2) Ond ni chaiff y Comisiwn—
 - (a) benthyca arian;
 - (b) caffael tir neu eiddo arall heb gydsyniad Gweinidogion Cymru; neu
 - (c) ffurfio a hyrwyddo cwmnïau.

13 Dirprwyo

- (1) Caiff y Comisiwn ddirprwyo i un neu fwy o'i aelodau neu gomisiynydd cynorthwyol y swyddogaethau hynny o dan Benodau 2 i 4, 6 neu 7 o Ran 3 (swyddogaethau ynghylch cynnal adolygiadau o lywodraeth leol neu ymchwiliadau lleol) a benderfynir ganddo i'r graddau y mae wedi eu dirprwyo felly.
- (2) Nid yw is-adran (1) yn effeithio ar—
 - (a) cyfrifoldeb y Comisiwn dros arfer swyddogaethau dirprwyedig, na
 - (b) gallu'r Comisiwn i arfer swyddogaethau dirprwyedig.

14 Cyfarwyddiadau

- (1) Rhaid i'r Comisiwn gydymffurfio ag unrhyw gyfarwyddyd (boed yn gyffredinol neu'n benodol) a roddir iddo gan Weinidogion Cymru.
- (2) Caniateir i gyfarwyddyd a roddir gan Weinidogion Cymru o dan y Ddeddf hon gael ei amrywio neu ei ddirymu drwy gyfarwyddyd dilynol.

Materion ariannol

15 Cyllido

- (1) Caiff Gweinidogion Cymru dalu grantiau i'r Comisiwn o symiau a benderfynir ganddynt.
- (2) Gwneir grant yn ddarostyngedig i unrhyw amodau a bennir gan Weinidogion Cymru (gan gynnwys amodau ynghylch ad-dalu).